



Siaran Akhbar

PROGRAM KIDS AT AMBD SEMPENA CUTI PENGGAL PERSEKOLAHAN AKHIR TAHUN

1. Autoriti Monetari Brunei Darussalam (AMBD), dengan kerjasama Creativate Sdn Bhd, telah mengadakan Program #KidsatAMBD sempena cuti penggal persekolahan akhir tahun 2018. Program tersebut telah diadakan dari hari Rabu, 5 Disember 2018 hingga hari Jumaat, 7 Disember 2018 di Galeri Mata Wang AMBD, Bangunan BCMB, Kompleks Kementerian Kewangan dan Ekonomi.
2. Semasa program tersebut, Creativate telah melancarkan *Financial Literacy Camp* mereka bagi pertama kalinya. Program ini antaranya bertujuan untuk memperkenalkan mengenai perkembangan mata wang Negara Brunei Darussalam, dan juga pengetahuan asas mengenai cara-cara untuk menjadi celik kewangan melalui aktiviti-aktiviti kreatif.
3. Program 3 hari tersebut telah disertai seramai lebih 40 kanak-kanak yang berumur di antara 7 ke 12 tahun. Pada hari pertama, para peserta telah diperkenalkan kepada sistem pertukaran barang (*barter system*), masalah yang boleh timbul dalam menggunakan sistem ini, dan seterusnya rasional bagi menggunakan mata wang tunai untuk berjual beli. Pada hari kedua, para peserta telah belajar mengenai ciri-ciri sekuriti mata wang Negara Brunei Darussalam melalui aktiviti "*follow-the-clue*". Pada hari ketiga pula, sebuah aktiviti membeli-belah telah diadakan, yang bertujuan untuk mengajar para peserta mengenai cara-cara berbelanja secara berhemah, dan seterusnya mengenali konsep asas menabung dan pelaburan.
4. Creativate adalah sebuah syarikat tempatan baru yang bertujuan untuk mengembangkan pendidikan kanak-kanak melalui program peningkatan kesedaran secara kreatif, antaranya seperti bagi perlindungan alam sekitar, muzik dan pergerakan, kesenian dan kraf tangan, dan juga kemahiran asas seperti membaca dan menulis.
5. Program Kids at AMBD ini diharap akan dapat mendidik kanak-kanak untuk menghargai mata wang Negara Brunei Darussalam, dan memahami kepentingan untuk menjadi seseorang yang celik kewangan. Program ini juga merupakan salah satu inisiatif AMBD untuk menyokong perniagaan-perniagaan kecil tempatan.

Autoriti Monetari Brunei Darussalam

Ref: AMBD/COMMS/3

Date: 3 Rabiulakhir 1440 / 11 December 2018